

# УШ-АКЫЛЫМ ТЕРГЕНЫТ

Марий тиште кечылан пӧлеклалтше «Возыктыш - калыкын уш-акылже» квиз-модыш Морко рӱдӧ книгагудышто моткоч веселан эртыш. Марий йылмым да сылнымутым йӧратыше-влак тушто шке уш-акылыштым тергышт. Тиде - Морко книгагудо пашаен-влак, Шӱргыял, Морко 2-шо №-ан школ-влакын тунемшышт.

Модыш ныл тур гыч шоген. Команде-влакым марий сылнымут дене кылдалтше онай заданий вучен: марий тиштын историйже; эх, пайремет, пайремет; марий йылме да литератур; мыскара йодыш-влак.

Конкурс коклаште книгагудо пашаен-влак мыскара сценкым модыч, сылне мурым мурышт. «Морко пашам» клубын чолга участникше Галина Васильевна Кузьмина марий йылмылан негызым пыштыше Сергей Чавайнын образшым устан почо, «Ото почелмутым сылнын лудо.



Жюрин пашажым Морко книгагудо системын методико-библиографический пӧлка вуйлатышыже Алевтина Павлова ден Морко тӱвыра пӧртын калык кидпаша дене пашам ыштыше методистше Эльвира Сергеева моткоч устан шуктышт.

Кажне тур ойыртемалтше лийын. Эн сай шинчымашым Шӱргыял школын тунемшыже-влак ончыктышт. Нуно чыла гаяк йодышлан чын вашештышт. Коеш, сайынак ямдылалтыныт. Сандене тиде команде сенгышыш лекте. Кокымшо верым Морко 2-шо номеран школын командыже нале, кумшым - книгагудо пашаен-влак.

Саламлыме мутым Морко муниципальный районым вуйлатыше, «Единый Россий» партийын верысе отделений секретарьже Светлана Иванова каласыш, квиз-модышын участникше-влаклан шарнымаш пӧлекым кучыктыш.

**Людмила АЛЕКСАНДРОВА,**  
библиограф